

Said Hadžiahmetović

APEL UPUĆEN HISTORIČARIMA

Dozvolite mi da vam se kratko obratim i dam jedan prijedlog. Prije dva dana Međureligijsko vijeće BiH poklonilo je medijima *Glosar religijskih pojmova* s ciljem da iste pravilno upotrebljavaju, jer zloupotreba ili pogrešna upotreba religijskih pojmova imala je i može imati dalekosežne negativne posljedice.

Juče i danas pažljivo sam pratio vaš rad i čuo, uz ostalo, mnogo i o upotrebi i zloupotrebi historije. Predložio bih, ako je ikako moguće, da i vi uradite sličan poduhvat, kakav je poduzelo Međureligijsko vijeće izdavanjem *Glosara religijskih pojmova*. Mislim da detaljnije obrazloženje nije potrebno.

Ipak, ako vi ne uradite ovaj posao, možda će oni koji vas zloupotrebljavaju uraditi "naučni" rječnik gdje će, primjera radi, rodoljublje značiti sijanje mržnje protiv drugih, patriotizam-ubijanje drugih, humanizam - protjerivanje drugih, herojstvo- ubijanje djece i starih osoba, a provođenje genocida-osiguranje mjesta u raj. Dobro ste čuli- u raj, nisam rekao u Hagu, jer su neke, koje sada traži Hag, predlagali da budu proglašeni svecima. Imao sam, nažalost, prilike da slušam i ljude vaše struke sa najvišim zvanjima kako "naučno" objašnjavaju neka događanja i određene pojave kao da sa historijom nemaju nikakve veze.

Biću sretan ako moj prijedlog pažljivo razmotrite, a neizmjereno zahvalan ako dođe i do njegove realizacije. Na taj način omogućili bi novinarima da ne upadaju u neprilike zbog nepoznavanja određenih pojmova iz vaše oblasti, koje sada mnogi tumače prema vlastitim potrebama.

Ako ovako ili nešto slično ne učinite, bojim se da vam sadašnje i buduće generacije neće oprostiti, još određenije da vam nauka (historija prije svega) neće oprostiti!?!

Hvala vam što ste mi omogućili da prezentiram ovaj prijedlog. Čestitam na uspješnom radu ovog naučnog skupa uvjeren da će vaš rad ubuduće biti još uspješniji i plodonosniji, uključujući i realiziranje mog ili nekog sličnog prijedloga.